

ПЯТАЯ СЕДМИЦА СВЯТАГО ВЕЛИКАГО ПОСТА.

**Вторник пятыя седмицы.
На шестом часе.**

Тропарь пророчества, глас 3:

Заступник наш Бог Иаковль, и Защититель есть в день печали.

Слава, и ныне: тойже.

Прокимен, глас 6:

Нищ есмь аз, / и в трудех от юности моея. Стих: Господи Боже спасения моего, во дни возвах и в нощи пред Тобюю.

Пс 87:16А, 2

Пророчества Исаиина чтение.

Тако глаголет Господь: кому уподобисте Господа, и коему подобию уподобисте Его? Еда образ сотвори древоделатель, или златарь сливав злато позлати его, или подобием сотвори его? Древо бо негниющее избирает древоделатель, и мудре ищет, како поставит образ его, и да не поколеблется. Не разумеете ли, не слышасте ли, не возвестися ли вам исперва? Не разумеете ли основания земли? Содержай круг земли и живущия на ней, аки прутья, поставивый небо, яко камару, и простер е, яко скинию обитати. Дай князи, аки ничтоже, владети, и землю, аки ничтоже сотвори. Не насадят бо, ниже насеют, и не вкоренятся в земли корение их, дхне на них ветер и исхоша, и буря, аки стеблие возмет их. Ныне убо кому Мя уподобисте, и вознесуся, рече Святыи? Возрите на высоту очима вашима и видите, кто сотвори сия вся? Носый по числу утварь Свою, и вся по имени прозовет от многия славы, и в державе крепости Своея ничтоже утайся от тебе. Еда бо речеши Иакове, и что глагола еси Израилю? Утайся путь мой от Бога, и Бог мой суд отъя и отступи. И ныне не уразумел ли еси, ни ли слышал еси? Бог вечный, Бог устроивый концы земли, не взалчет, ниже утрудится, ниже есть изобретение премудрости Его. Дай алчущим крепость и неболезненным печаль. Взалчут бо юнейшии и утрудятся юноты, и избраннии не крепцы будут. Терпящии же Господа изменят крепость.

Ис 40:18–31

Прокимен, глас 6:

Блажени людие, / ведущии воскликновение. Стих: Господи, во свете лица Твоего пойдем.

Пс 88:16

**Вторник пятыя седмицы.
На вечерни.**

Прокімен, глас 4:

Господи, прибежище был еси нам / в род и род. **Стих:** Прежде даже горам не быти, и создатися земли и вселенней, и от века и до века Ты еси.

Пс 89:1, 2

1. Бытия чтение.

Бысть слово Господне ко Авраму в видении нощию, глаголя: не бойся Авраме, аз защищаю тя, мзда твоя многа будет зело. Глагола же Аврам: Владыко Господи, что ми даси? аз же отпускаюся безчаден, сын же масек домочадицы моея, сей Дамаск Елиезер. И рече Аврам: понеже мне не дал еси семени, домочадец же мой наследник мой будет. И абие глас Господень бысть к нему, глаголющий: не будет сей наследник твой, но иже изыдет из тебе, той будет наследник тебе. Изведе же его вон и рече ему: возри на небо, и изочи звезды, аще возможеша исчезти я. И рече: тако будет семя твоё. И верова Аврам Богу, и вменися ему в правду. Рече же к нему: аз есмь Бог изведый тя от страны Халдейския, яко дати тебе землю сию наследствовати. И рече: Владыко Господи, по чесому уразумею, яко наследити ю имам? Рече же к нему: возми мне юницу трилетну, и козу трилетну, и овна трилетна, и горлицу, и голубя. Взят же он вся сия и раздели я на полы, и положи я противолічна едина к другому, птиц же не раздели. Слетеша же птицы на телеса растесаная их, и седе близу их Аврам. Заходящу же солнцу, ужас нападе на Аврама, и се страх темен велий нападе на нь. И речено бысть ко Авраму: ведый увеси, яко пресельно будет семя твоё в земли не своей, и поработят я, и озлобят я, и смирят я лет четырёхста. Языку же, емуже поработают, сужду аз; по сих же изыдут семя со имением многим. Ты же отыдеши ко отцем твоим в мире, препитан в старости добрей.

Быт 15:1–15

Прокімен, глас 4:

Живый в помощи Вышняго, / в крове Бога Небеснаго водворится. **Стих:** Речет Господеву: Заступник мой еси.

Пс 90:1, 2А

2. Притчей чтение.

Устне мудрых связуются чувством, сердца же безумных не тверда. Жертвы нечестивых мерзость Господеву, обеты же правоходящих приятны Ему. Мерзость Господеву путие нечестивых, гонящая же правду любит. Наказание незлобиваго познавается от мимоходящих, ненавидящие же обличения скончаваются срамно. Ад и пагуба явна пред Господем, како не и сердца человеков? Не возлюбит ненаказанный обличающих его, с мудрыми же не

побесѣдует. Сѣрдцу веселящуся, лицѣ цветѣт, в печалех же сущу, сетует. Сѣрдце право ищет чувства, уста же ненаказанных уразумеют злая. На всяко время очи злых приемлют злая, добрии же безмолвствуют присно. Лучше частица малая со страхом Господним, нежели сокровища велия без боязни. Лучше учреждение от зелий с любовью и благодатию, нежели представление тельцев со враждою. Муж ярый устраивает брани, долготерпеливый же и будущую укрощает. Терпеливый муж угасит суды, нечестивый же воздвигает паче. Пути праздных постланы тернием, мужественных же углаждени.

Притч 15:7–19